



**LAPORAN LIPUTAN MEDIA HARIAN
RABU 2 FEBRUARI 2022**

BIL	TAJUK KERATAN AKHBAR	KEMENTERIAN / JABATAN / AGENSI
1.	KERAJAAN TAMPUNG SUBSIDI HARGA BAHARU RUNCIT AYAM, UM -ONLINE	LAIN-LAIN
2.	INTERVENSI KERAJAAN JAMIN KESTABILAN HARGA AYAM STANDART, BH -ONLINE	
3.	HARGA SILING RUNCIT AYAM RM8.90 SEKILOGRAM, SH -ONLINE	

UKKMAFI

UNIT KOMUNIKASI KORPORAT
KEMENTERIAN PERTANIAN DAN INDUSTRI MAKANAN
(UNTUK EDARAN DALAMAN MAFI, JABATAN DAN AGENSI SAHAJA)

TARIKH	MEDIA	RUANGAN	MUKA SURAT
2/2/2022	UTUSAN MALAYSIA	ONLINE	

Kerajaan tampung subsidi harga baharu runcit ayam



PENJUAL ayam segar tertekan dengan pelaksanaan SHMKM kerana harga kawalan maksimum yang diputuskan kerajaan menyebabkan keuntungan mereka menyusut susulan kos modal yang tinggi terpaksa dikeluarkan. - UTUSAN/MUHAMMAD SHAHIZAM TAZALI

PUTRAJAYA: Penetapan harga baharu runcit ayam pada harga RM8.90 sekilogram sebagaimana diputuskan Mesyuarat Khas Majlis Tindakan Sara Hidup Negara (NACCOL) Mengenai

Industri Pengeluaran Makanan pada 31 Januari lalu ditampung melalui subsidi kerajaan sehingga kos pengeluaran ayam kembali rendah dan stabil.

Menteri Perdagangan Dalam Negeri dan Hal Ehwal Pengguna, Datuk Seri Alexander Nanta Linggi berkata, industri pengeluaran ayam dan telur menerima impak kenaikan mendadak kos input makanan jagung dan soya yang merangkumi 70 peratus kos penternakan ayam.

Beliau menjelaskan, dengan peningkatan kos pengeluaran, maka, pihak industri mengemukakan kepada kerajaan supaya harga kawalan dinaikkan.

“Sekiranya tiada intervensi daripada kerajaan, harga runcit ayam di pasaran pada masa ini melebihi RM10 sekilogram.

“Harga runcit RM8.90 ini merupakan penurunan kali ketiga selepas ditetapkan pada RM9.50 semasa Perayaan Deepavali, RM9.30 ketika Skim Harga Maksimum Keluarga Malaysia (SHMKM) dari 7 hingga 31 Disember tahun lalu dan RM9.10 semasa SHMKM dari 1 Januari hingga 4 Februari ini,” katanya dalam kenyataan hari ini.

Kerajaan menetapkan harga siling runcit ayam itu berkuat kuasa 5 Februari ini setelah berakhirnya SHMKM sehari sebelumnya dan harga ini kekal sehingga 5 Jun depan iaitu selama 121 hari bagi menjamin kestabilan harga ayam dan juga harga makanan lain yang berkaitan.

Alexander berkata, penetapan harga siling runcit ayam bagi Labuan, Sabah dan Sarawak akan dibuat berdasarkan lokasi.

Beliau berkata, beberapa ketetapan rakyat-centric bersabit dengan industri pengeluaran ayam dan telur juga diputuskan dalam mesyuarat NACCOL dipengerusikan Perdana Menteri, Datuk Seri Ismail Sabri Yaakob itu antaranya harga telur ayam semua gred kekal seperti harga maksimum runcit SHMKM semasa.

Kata beliau, harga siling runcit ayam dan telur akan dikaji dari semasa ke semasa bergantung kepada faktor-faktor yang mempengaruhi pengeluaran ayam dan telur ayam negara.

“Kementerian memastikan pelaksanaan arahan kerajaan kepada agensinya, Suruhanjaya Persaingan Malaysia (MyCC) untuk membuat siasatan berterusan bagi memastikan tiada wujudnya kartel dalam pakatan menentukan harga ayam dan telur.

**“Semua ketetapan termasuk pelan tindakan jangka panjang yang diputuskan akan dibincangkan lebih terperinci dalam Mesyuarat Taskforce Pelaksanaan dipengerusikan Kementerian Kementerian Pertanian dan Industri Makanan dan dilaporkan dalam mesyuarat NACCOL akan datang,” katanya. -
UTUSAN ONLINE**

TARIKH	MEDIA	RUANGAN	MUKA SURAT
2/2/2022	BERITA HARIAN	ONLINE	

Intervensi kerajaan jamin kestabilan harga ayam standard



Alexander Nanta Linggi ketika melawat Pasar Besar Pudu sempena hari pertama pelaksanaan Skim Harga Maksimum Musim Perayaan Tahun Baru Cina 2022 pada 29 Januari lalu. - Foto NSTP/Rohanis Shukri

PUTRAJAYA: Langkah intervensi kerajaan menetapkan harga runcit bagi ayam standard pada RM8.90 berkuat kuasa Sabtu ini hingga 5 Jun dapat menjamin kestabilan harga ayam dan harga makanan berkaitan, kata Menteri Perdagangan Dalam Negeri dan Hal Ehwal Pengguna, Datuk Seri Alexander Nanta Linggi.

Sekiranya kerajaan tidak melaksanakan langkah itu, harga runcit ayam di pasaran pada masa ini akan melebihi RM10 sekilogram susulan peningkatan kos penternakan ayam sebanyak 70 peratus.

"Dalam Mesyuarat Khas Majlis Tindakan Sara Hidup Negara (NACCOL) mengenai Industri Pengeluaran Makanan pada 31 Januari lalu, mesyuarat telah diberikan taklimat berkenaan industri pengeluaran ayam dan telur yang menerima impak kenaikan mendadak kos input makanan jagung dan soya.

"Berikutan peningkatan kos pengeluaran, maka pihak industri telah mengemukakan kepada kerajaan supaya harga kawalan dinaikkan," katanya dalam satu kenyataan hari ini.

Isnin lalu, Perdana Menteri Datuk Seri Ismail Sabri Yaakob mengumumkan harga runcit maksimum bagi ayam standard dikurangkan sebanyak 20 sen kepada RM8.90 daripada harga siling RM9.10 yang ditetapkan, selepas mempengerusikan Mesyuarat NACCOL.

Nanta berkata, harga siling runcit ayam bagi Labuan, Sabah dan Sarawak pula akan dibuat berdasarkan lokasi.

Harga runcit itu adalah penurunan kali ketiga selepas ditetapkan pada RM9.50 sekilogram ketika Deepavali, RM9.30 ketika Skim Harga Maksimum Keluarga Malaysia (SHMKM) (7 hingga 31 Disember) dan RM9.10 ketika (SHMKM) (1 hingga 4 Februari).

"Penetapan harga baru runcit ayam ini ditampung melalui subsidi kerajaan hingga kos pengeluaran ayam kembali rendah dan stabil," katanya.

Nanta berkata pihaknya sentiasa menyokong langkah proaktif kerajaan bagi memastikan Dasar Sekuriti Makanan Negara sentiasa terjamin dari segi bekalan serta mengelak berlaku kenaikan harga yang membebankan rakyat.

Hasil Mesyuarat Taskforce Pelaksanaan mengenai pelan tindakan jangka panjang berkaitan bekalan makanan yang akan dipengerusikan Kementerian Pertanian dan Industri Makanan (MAFI) tidak lama lagi akan dilaporkan ke Mesyuarat NACCOL akan datang. – BERNAMA

TARIKH	MEDIA	RUANGAN	MUKA SURAT
2/2/2022	SINAR HARIAN	ONLINE	

Harga siling runcit ayam RM8.90 sekilogram



KPDNHEP menetapkan harga siling runcit ayam standard RM8.90 sekilogram di Semenanjung bermula Sabtu. - Gambar hiasan

SHAH ALAM - [DIKEMASKINI] Kementerian Perdagangan Dalam Negeri dan Hal Ehwal Pengguna (KPDNHEP) menetapkan harga siling runcit ayam standard RM8.90 sekilogram di Semenanjung bermula Sabtu.

Menterinya, Datuk Seri Alexander Nanta Linggi berkata, ia akan bermula setelah berakhirnya Skim Harga Maksimum Keluarga Malaysia (SHMKM) pada Jumaat

Menurutnya, harga tersebut akan kekal sehingga 5 Jun 2022 iaitu selama 121 hari bagi menjamin kestabilan harga ayam dan juga makanan lain yang berkaitan.

“Penetapan harga siling runcit ayam bagi Labuan, Sabah dan Sarawak akan dibuat berdasarkan lokasi.

“Mesyuarat Khas Majlis Tindakan Sara Hidup Negara (NACCOL) juga telah diberikan taklimat berkenaan industri pengeluaran ayam dan telur yang menerima impak kenaikan mendadak kos input makanan jagung dan soya merangkumi 70 peratus kos penternakan ayam.

“Dengan peningkatan kos pengeluaran makanan, pihak industri mengemukakan kepada kerajaan supaya harga kawalan dinaikkan dan sekiranya tiada intervensi daripada kerajaan, harga runcit ayam di pasaran masa ini akan melebihi RM10 sekilogram,” katanya dalam satu kenyataan pada Rabu.

Nanta berkata, harga runcit RM8.90 merupakan penurunan kali ketiga selepas ditetapkan pada RM9.50 semasa perayaan Deepavali, RM9.30 ketika SHMKM dari 7-31 Disember 2021 serta RM9.10 semasa SHMKM dari 1 Januari hingga 4 Februari 2022.

Tambah beliau, penetapan harga baru runcit ayam akan ditampung melalui subsidi kerajaan sehingga kos pengeluaran ayam kembali rendah dan stabil.

“Beberapa ketetapan rakyat-centric bersabit dengan industri pengeluaran ayam dan telur juga telah diputuskan dalam mesyuarat NACCOL tersebut, antaranya adalah harga telur semua gred kekal seperti harga maksimum runcit SHMKM semasa.

“Pelaksanaan kedua-dua harga siling runcit ayam dan telur ini bermula 5 Februari sehingga 5 Jun 2022.

Bagaimanapun harga siling runcit ini akan dikaji dari semasa ke semasa bergantung kepada faktor-faktor yang mempengaruhi pengeluaran ayam dan telur dalam negara.

“Seterusnya, permit import ayam bulat dibuka kepada semua pemegang Permit Kelulusan (AP) bagi mengimport ayam berbanding sebelum ini, mereka hanya dibenarkan mengimport keratan ayam seperti kepek, paha dan lain-lain,” ujarnya.

Mengulas lanjut, Nanta berkata, mesyuarat juga bersetuju AP mengimport ayam dibuka kepada pengusaha pasar raya besar (hypermarket).

Jelasnya, KPDNHEP juga ingin menyatakan sokongan terhadap keputusan proaktif kerajaan dalam memastikan Dasar Sekuriti Makanan Negara sentiasa terjamin bukan sahaja dari segi bekalan tetapi juga pada harga yang tidak membebankan rakyat Malaysia.

“Menyokong penyelidikan yang dilaksanakan oleh Institut Penyelidikan dan Kemajuan Pertanian Malaysia (MARDI) untuk menjadikan isi rong kelapa sawit sebagai alternatif kepada jagung dan soya yang diimport sepenuhnya sebagai makanan ayam.

“Mencadangkan kepada kerajaan negeri untuk memanjangkan tempoh penggunaan tanah di bawah lesen pendudukan sementara (TOL) bagi aktiviti pertanian.

“KPDNHEP akan memastikan pelaksanaan arahan kerajaan kepada agensinya, Suruhanjaya Persaingan Malaysia (MyCC) untuk membuat siasatan berterusan bagi memastikan tiada wujudnya kartel dalam pakatan menentukan harga ayam dan telur,” katanya.

Menurut Nanta, semua ketetapan termasuk pelan tindakan jangka panjang yang diputuskan akan dibincangkan dengan lebih terperinci dalam Mesyuarat Taskforce Pelaksanaan yang akan dipengerusikan oleh MAFI dan akan dilaporkan dalam mesyuarat NACCOL akan datang.